

# Beurtkrag steeds 'n hoofpyn

Fase 6 van beurtkrag, wat nog net eenkeer toegepas is, lyk na 'n veel meer algemene gebeurtenis in 2020 aangesien die aanvraag op die aanleg op gevaarlike hoë vlakke bly. Fase 6 beteken dat 6000 MW van die net verwyder word om te voorkom dat die stelsel onstabiel raak. In Gauteng, waar intervalle vir beurtkrag tot en met vier uur lank duur, kan Eskom-kliënte gemiddeld tien uur per dag sonder elektrisiteit wees. Oor die naweek het Eskom na fase 2 van beurtkrag oorgeskakel om 2000 MW van die netwerk af te haal. As die vraag op normale vlakke was, terwyl almal weer by die werk was, sou dit Saterdag en Sondag na Fase 6 moes oorskakel. Die vraag oor die vakansietydperk is ongeveer 4000 MW laer as normaal. Chris Yelland, besturende direkteur by EE Business Intelligence, wat die vraag en werkverrigting van Eskom dophou, sê dat die vraag van elektrisiteit in die laaste week van Januarie 2018 28864 MW was. In die laaste week van Desember het die vraag so laag as 25294 MW gedaal. Volgens Eskom moet die onklaarraking van aanlegte tot 9500 MW se kapasiteit beperk word om beurtkrag te voorkom. Die afbreekpunte was die afgelope twee weke aansienlik hoër en het Vrydag 14096 MW bereik. Maandag se afbreekpunte was 06:00 op 13119MW. Ondanks die pogings van die bestuur van Eskom in die afgelope twee jaar, het die energievoorkomingsfaktor steeds afwaarts bly neig. Oor 2019 as geheel was Eskom se faktor vir energie beskikbaarheid 67%, sê Yelland. Dit vergelyk met 72% oor 2018 en 79% oor 2017.



## In die huwelik bevestig



Elsabé Keogh, dogter van John en Rita Keogh en Andries Müller, seun van Gerrie en Cornelia Müller is getroud op 14 Desember 2019 en hou makietie op Lions Lake naby Frankfort. Elsabé is 'n grafiese ontwerper by Heilbron Herald sedert 2018 en Andries 'n gekwalifiseerde passer en draaier en begin sy eie besigheid binnekort in Heilbron. Die paartjie vestig hulself in Heilbron en is opgewonde oor hul toekoms saam.

## Briewe aan: Redakteur

Die volgende skrywe is ontvang van Heléne Howell van Huis Bron-van-Heilgerig aan die redakteur.

Elke vars bewolkte môre, elke blom, elke voëltjie se sang is God se stem wat vir Sy kinders sê: Hier is Ek, by My is alle dinge moontlik! Onthou, Ek sorg vir jou.

Gebed is 'n gawe van God, nie gebonde aan tyd of natuur - of dit nou winter of somer is, jy kan altyd 'n boodskap Hemel toe stuur, Hy is altyd beskikbaar. Bron onbekend.

'n Man gee vir 'n seuntjie R10 en sê: "Wys vir my dat daar 'n God is, dan gee ek vir jou R10." Dadelik antwoord die seuntjie toe vir

die man: "Oom ek gee vir jou 'n R1 000, as jy vir my kan bewys dat daar nie 'n God is nie." Die man kon hom nie daarop antwoord nie want hy kon dit nie bewys nie. Hoe kon hy ook want hy het nie in sy lewe, Jesus ontmoet nie. Bron onbekend.

Jesus is: jou glimlag, jou vreugde, jou krag, jou beskerming, jou alles!

Wees volkome rustig in Sy arms. weet dat Hy jou toevou in Sy Liefde! Mag jy dit in 2020 ook ervaar. - Bron: S Joubert

Ingestuurd deur Heléne Howell.

## Skeerstoer Kroeg open sy deure

Die Skeerstoer Kroeg het 'n behoorlike boere-opskop op oujaarsaand aangebied in samewerking met Donsveertjie. Hierdie kroeg het sy amptelike opening gehou op 31 Desember 2019. Groot beplanning is deur Arno Els gedoen om hierdie aand 'n sukses te maak en Die Skeerstoer Kroeg se personeel het vir weke aaneen gewerk om alles reg te kry vir die geleentheid. Selfs 'n Springkasteel was opgeslaan om die kinders te vermaak. Met slegs 150 kaartjies beskikbaar en uitverkoop teen 28 Desember het die geleentheid uit sy nate gebars en moes Die Skeerstoer Kroeg reg staan om op die ou-einde 230 mense te verwelkom. Die midnag-vuurwerke was beslis 'n hoogtepunt van die aand om die nuwe jaar te ver-

welkom. DJ Tech-Hannes en die nuutgeboude dansvloer deur Willie Pieters het tonne dans-genot aan almal verskaf. Daar was ook vure tot elkeen se beskikking om 'n lekker braai-vleisie te kon braai. Om die aand interessant te maak is daar net na midnag 5 wenners aangekondig wie elkeen met 'n unieke bottel drank weggestap het.

Die Skeerstoer Kroeg se personeel het omtrent rondgehardloop om almal te probeer gelukkig hou en alhoewel die kroeg reg deur die aand baie besig was, was die aand 'n groot sukses. Die laaste gaste het die perseel om 06:00 die volgende oggend verlaat.

Die Skeerstoer Kroeg se Facebookblad bevat al die inligting oor die tye wanneer die kroeg sal oop wees. Die Skeerstoer wens almal 'n voorspoedige nuwejaar toe.



Op die foto vl: Prysenners: Irene Prinsloo, Johan de Lange, Arno Els ontvang namens Ryno Petzer sy prys, Jaco Calitz, Ryan du Plessis.

